

Inulerisunnigorniarluni ilinniarfinni annertuumik innarluuteqartunut passussisinnaanermik innarluuteqariaatsinillu assigiinngitsunik atuartitsissutini pinngitsoorani ilinniartitsinermik atuutilernissamik naalakkersuisut suliaqaqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Aleqa Hammond, Siumut)

Akissuteqaat

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Siullermeerinnineq

Inatsisartunut ilaasortaq Aleqa Hammond, Siumut, Inulerisunnigorniarluni ilinniarfinni annertuumik innarluuteqartunut passussisinnaanermik innarluuteqariaatsinillu assigiinngitsunik atuartitsissutini pinngitsoorani ilinniartitsinermik atuutilernissamik naalakkersuisut suliaqaqqullugit peqquneqarnissaannik Inatsisartut aalajangiiffigisassaattut siunnersuuteqarpoq.

Perorsaanermik Ilinniarfimmi ilinniartitaanerni ilinniarnissamut aqqissuussinernik, kiisalu faginik pikkorissartitsinernillu allanik neqeroorutaasunik ingerlaavartumik naleqqussaasoqartarpoq ilinniartut isumaginninnermut tunngasuni atuunnerpaamik tamatigut atuartinneqartartussanngorlugit.

Tamanna aamma isumaginninnermi ikiortitut ilinniartitaanermut atuuppoq.

Isumaginninnermi ikiortitut ilinniartitaanermi innarluutilinnik passussisinnaaneq immikkut fagitut ilaatinneqanngilaq, taamaattorli fagini perorsaaneq/psykologi aamma isumaginnineq/inuiaqatigii-lerineq pillugit ulluinnarni atuartitsinermut ilaatinneqarluni. Taamatuttaaq innarluutilinnik passussisinnaaneq sap.ak. sammisaqarfimmi imaluunniit piffissani itisiliiffiusuni assigiinngitsuni ilaatinneqartarpoq.

Aammattaaq piffissat praktikerfiusut assigiinngitsut aqqutigalugit immikkut sammisaqarfimmi – taakkununga ilanngullugit innarluutilinnut tunngasuni sullissiveqarfimmi assigiinngitsuni praktikernissaq periarfissaavoq.

Perorsaanermik Ilinniarfik ”Innarluutilit aamma isumaginninnermi perorsaaneq” pillugit piginnaasanik ineriartortitsinermik pikkorissartitsisarpoq, aamma ilinniarsimangitsunut.

Pikkorissartitsisarnerit taakku aqqutigalugit pikkorissartut innarluutinik assigiinngitsunik, kiisalu inuit pisinnaasakillimasat sammillugit isumaginninnermi perorsaanermik paasisimasaqalersarput.

Pikkorissartut innarluutilinnut tunngasuni sulinerminnut atatillugu innarluutilimmut pissusilersortarnermik ineriartortitsinissaat akuliutsitsiniarnermillu ajornartorsiuteqarnermik paasisimasaqalernissaat siunertaavoq.

Taamaalilluni sammisat ilaat innarluutilinnut tunngasunut attuumassutilerujussuit pikkorissartunit sammineqartarput, assersuutigalugit makku:

- Innarluutit assigiinngitsut pillugit tunngaviusumik ilisimasassat
- Inuit tarnimikkut nappaatillit pisinnaasaat pisariaqartitaallu
- Innarluutillit pillugit paasinnittaasitoqaaq paasinneriaaserlu nutaaq
- Inunnik isiginninneq, ineriartornermik isiginninneq, innarluutilinnut tunngatillugu tunngaviusumik isummat
- Akuliutsitsineq nalinginnaasunngorsaanerlu – innarluutillit inuiaqatigiinni toqqorneqassappat takussaassappalluunniit?
- Ileqqorissaarneq sunaana?
- Innarluutilimmut pissusilersorneq – Innarluutilimmut pissusera qanoq ippa?
- Il.il.

Perorsaanermik Ilinniarfimmud branchudvalgi naliliisimavoq isumaginninnermi ikiortitut ilinniartitaanermi innarluutilinnut tunngasunik atuartitsineq naammattoq taamaalillunilu 2008-mi ilinniartitaanermut ilinniarnissamut aqqissuussinnermik nutarterineq kingulleq akuerisimallugu.

Qulaani allasimasut tunuliaqutaralugit Naalakkersuisut naliliipput isumaginninnermi ikiortinngorniat ullumikkut innarluutilittatsinnik passussinissaq pillugu ninngusuumik nutartikkamillu ilisimalersinneqartareertut innarluutinullu assigiinngitsunut paasisimasaqalereertarlutik.

Taamaattumik oqaaseqaatit qulaaniittut tunuliaqutaralugit aalajangiiffigisassatut siunnersuutip akuerineqannginnissaa Naalakkersuisut inassutigissavaat.